





XUNTA DE GALICIA


PLAN DE FINANCIAMENTO DO SISTEMA UNIVERSITARIO DE GALICIA 2011-2015


En Santiago de Compostela, a 21 de decembro de 2010


REUNIDOS


 Dona Marta Fernández Currás, conselleira de Facenda, nomeada mediante o Decreto 81/2009, do 19 de abril, en virtude da competencia atribuída polo artigo 34.1 da Lei 1/1983, do 22 de febreiro, reguladora da Xunta e da súa presidencia.

 Don Jesús Vázquez Abad, conselleiro de Educación e Ordenación Universitaria, nomeado mediante o Decreto 81/2009, do 19 de abril, en virtude da competencia atribuída polo artigo 34.1 da Lei 1/1983, do 22 de febreiro, reguladora da Xunta e da súa presidencia.

 Don Javier Guerra Fernández, conselleiro de Economía e Industria, nomeado mediante o Decreto 81/2009, do 19 de abril, en virtude da competencia atribuída polo artigo 34.1 da Lei 1/1983, do 22 de febreiro, reguladora da Xunta e da súa presidencia.

 Don Juan José Casares Long, reitor da Universidade de Santiago de Compostela, en virtude da competencia atribuída no artigo 87 dos Estatutos da Universidade de Santiago de Compostela, aprobados polo Decreto 28/2004, do 22 de xaneiro (DOG do 9 de febreiro), e o seu nomeamento mediante o Decreto 99/2010, do 17 de xuño.

 Don José María Barja Pérez, reitor da Universidade da Coruña, en virtude da competencia atribuída no artigo 36 dos Estatutos da Universidade da Coruña, aprobados polo Decreto 101/2004, do 13 de maio (DOG do 26 de maio), modificados polo Decreto 194/2007, do 11 de outubro, e o seu nomeamento mediante o Decreto 3/2008, do 10 de xaneiro.

 Don Salustiano Mato de la Iglesia, reitor da Universidade de Vigo, en virtude da competencia atribuída no artigo 58 dos Estatutos da Universidade de Vigo, aprobados polo Decreto 7/2010, do 14 de xaneiro (DOG do 2 de febreiro), e o seu nomeamento mediante o Decreto 90/2010, do 10 de xuño.



XUNTA DE GALICIA

MANIFESTAN

En virtude do disposto no Real Decreto 1754/1987, do 18 de decembro, foron transferidas á Comunidade Autónoma de Galicia os servizos, institucións e medios persoais, materiais e orzamentarios en materia de universidades.

A Lei 11/1989, do 20 de xullo, de Ordenación do Sistema Universitario de Galicia, creou as Universidades de A Coruña e Vigo que, unidas á xa existente de Santiago de Compostela, conformaron o punto de partida do actual modelo de ensino superior na nosa comunidade autónoma.

En cumprimento do establecido na Disposición Adicional Cuarta da citada lei, o Goberno de Galicia remitiu ao Parlamento o Plan de Financiamento das Universidades para o período 1990-1996, que sería aprobado por unanimidade pola Comisión de Economía, Facenda e Presupostos.

Este modelo de financiamento, que tiña como principal criterio de asignación de recursos un módulo baseado no número de alumnos, prorrogouse ata o ano 1999, data na que entrou en vigor o segundo Plan de Financiamento 2000-2003 no que as transferencias correntes facíanse depender fundamentalmente do custe por crédito impartido en cada titulación, segundo o grao de experimentalidade da titulación ou ciclo académico.

Tendo como reto inmediato a adaptación do Sistema Galego Universitario ao Espazo Europeo de Educación Superior, afrontouse a elaboración do terceiro Plan de Financiamento 2005-2010 cuxa estrutura presentaba un fondo incondicionado, destinado a cubrir os custes ordinarios das universidades e un fondo de nivelación, destinado ás universidades de Vigo e A Coruña para favorecer a converxencia interna do sistema, vinculando a evolución de ambos fondos á experimentada polos ingresos non financeiros dos orzamentos consolidados da Xunta de Galicia. Pola súa banda, a Universidade de Santiago percibiría unhas achegas fixas nos anos 2007 e 2008 como contribución ao Plan de Saneamento desa institución. Prevíase tamén un fondo de investimentos dotado dun crédito inalterable nos anos de vixencia do plan. Para os fondos de calidade e de participación no Plan Galego de I+D+I, que serían distribuídos en réxime competitivo, asignouse unha evolución segundo porcentaxes fixadas no propio plan. A estrutura completábase coas achegas destinadas á dotación de prazas vinculadas do Servizo Galego de Saúde e do INEF e outras que as universidades recibirían a través de convenios e acordos coas distintas consellerías, entidades e organismos da Comunidade Autónoma.



XUNTA DE GALICIA

A crise económica coincidente cos últimos anos de vixencia deste plan e a excesiva dependencia das achegas da evolución dos ingresos non financeiros dos orzamentos consolidados da Xunta de Galicia, que no momento da aprobación do plan estimábase crecerían unha media anual do 6,5% repercutiu de xeito moi negativo no financiamento das universidades galegas, tanto que foi necesario recorrer a achegas complementarias nos exercicios 2009 e 2010 de 13.911.794 euros e 28.284.496 euros respectivamente, para compensar as caídas do -2% e -11,28% na taxa de ingresos non financeiros.

As debilidades mostradas por este plan, unidas aos cambios producidos no contexto académico e económico fan necesario un cambio no modelo de financiamento do Sistema Universitario de Galicia para permitir que malia o adverso contexto actual o noso ensino universitario avance na procura dos máis altos índices de calidade co compromiso da satisfacción eficiente das necesidades sociais e económicas que terá Galicia no futuro.

Ante este novo escenario, o novo plan de financiamento ten que servir, á vez, para facilitar novos recursos ás universidades, pero tamén para ordenar integralmente o sistema universitario galego. Os novos recursos teñen que atender ás necesidades das universidades galegas e deben comprometer ás institucións universitarias na satisfacción eficiente das necesidades sociais e económicas que Galicia terá no futuro.

Partindo deste contexto, os principios reitores do novo modelo de financiamento universitario para Galicia serán os seguintes: estabilidade financeira, suficiencia, eficiencia e equidade institucional.

Deste xeito, o novo plan basease, fundamentalmente, nunha subvención fixa que permita acadar o principio de suficiencia estática e, un financiamento variable vinculado aos resultados obtidos tanto polas actividades docentes como de investigación e transferencia, e no principio de flexibilidade que permitirá revisar anualmente o financiamento, unido a obxectivos para orientalo á mellora da calidade, e tendo en conta as peculiaridades de cada universidade.

ACORDAN

PRIMEIRO.- PLAN DE FINANCIAMENTO DO SISTEMA UNIVERSITARIO DE GALICIA, 2011-2015

Os termos deste documento configuran o Plan de Financiamento do Sistema Universitario de Galicia e a súa vixencia estenderase no período comprendido entre os exercicios económicos 2011 a 2015, ambos inclusive.



XUNTA DE GALICIA

SEGUNDO.- ACHEGAS DA COMUNIDADE AUTÓNOMA AO FINANCIAMENTO DO SISTEMA UNIVERSITARIO DE GALICIA

As achegas da Comunidade Autónoma ao financiamento do Sistema Universitario de Galicia realizaranse a través dos seguintes fondos:

I- FINANCIAMENTO ESTRUCTURAL, que contempla os fondos destinados ao financiamento dos custes estruturais derivados do normal funcionamento do Sistema Universitario de Galicia, componse das seguintes ferramentas:

a) Subvención fixa que comprende dous fondos diferenciados:

1.- Para o financiamento dos custes estruturais das tres universidades públicas de Galicia, contémpase un fondo que, no exercicio 2011 será distribuído nas mesmas porcentaxes que se viñan aplicando aos fondos asimilados do Plan de Financiamento do SUG 2005-2010.

Exceptuaranse deste criterio de reparto as contías correspondentes aos sexenios e complementos retributivos autonómicos recoñecidos ao persoal destas institucións. O seu importe engadirase ás transferencias realizadas a favor de cada universidade calculándose en base ás certificacións relativas aos tramos de investigación concedidos pola Comisión Nacional Evaluadora de la Actividad Investigadora e ás certificacións achegadas polo Consello Social de cada universidade.

Nos exercicios 2012 a 2015 a distribución deste fondo realizarase en aplicación de novos criterios de reparto que serán fixados polos asinantes antes do 31 de xullo de 2011 e que figurarán como addenda a este acordo. En todo caso vincularase cada ano o equivalente do 5% do total deste fondo aos novos criterios, de xeito que no ano 2015, un 20% deste fondo repartirase en función da aplicación dos mencionados novos criterios, sendo as contías restantes distribuídas en función das variables utilizadas no exercicio 2011.

No ano 2011 destinarase un crédito de 290.056.637,00 euros, correspondendo a cada universidade as contías seguintes:

Universidade de Santiago de Compostela	123.754.632,15 euros
Universidade da Coruña	78.285.726,59 euros
Universidade de Vigo	88.016.278,26 euros
Total SUG	290.056.637,00 euros

Realizaranse transferencias mensuais polo importe resultante da aplicación dos criterios de reparto acordados polos asinantes.



XUNTA DE GALICIA

Este fondo evolucionará segundo a porcentaxe de variación da masa salarial fixada pola lei de orzamentos da Comunidade Autónoma de Galicia para cada exercicio. A esta variación engadíranse os sexenios e complementos retributivos autonómicos derivados dos recoñecementos anuais polas entidades avaliadoras.

2.-Para o financiamento de investimentos de reparación e mellora, inclúese un fondo dotado de 5.048.502 euros. Esta contía permanecerá inalterable durante o período de vixencia do acordo. No ano 2011 repartirase cos mesmos criterios utilizados no ano 2010, podendo ser modificados en exercicios futuros, previo acordo entre a Consellería de Educación e Ordenación Universitaria e as tres universidades.

Para o exercicio 2011 distribuirase do seguinte xeito:

Universidade de Santiago de Compostela	1.971.320,00 euros
Universidade da Coruña	1.448.439,00 euros
Universidade de Vigo	1.628.743,00 euros
Total SUG	5.048.502,00 euros

A execución dos investimentos deberá xustificarse na forma que determine a Consellería de Educación e Ordenación Universitaria. Esta consellería, previa solicitude da universidade interesada, poderá autorizar excepcionalmente e por causas xustificadas, a modificación do destino deses recursos.

Así mesmo, terán consideración de Subvención Fixa os fondos diferenciados que, de seguido, se especifican:

*Mantemento dos Consellos Sociais das universidades galegas co fin de asegurar o normal funcionamento destes órganos de goberno. Para tal fin, transferiranse mensualmente a cada unha das universidades a contía correspondente ao seu Consello Social.

Estes fondos repartiranse, durante os anos de vixencia do presente acordo, en función dos criterios acordados entre os propios Consellos Sociais e a Consellería de Educación e Ordenación Universitaria.

No ano 2011 destínanse un total de 600.000 euros resultando o seguinte reparto, en aplicación dos mencionados criterios:

Consello Social da USC	200.000,00 euros
Consello Social da UDC	200.000,00 euros
Consello Social da UVigo	200.000,00 euros.



XUNTA DE GALICIA

*Mantemento da Axencia para a Calidade do Sistema Universitario de Galicia, parte indispensable do Sistema Universitario de Galicia, e co fin de asegurar o seu normal funcionamento.

Con este fin destinarase no ano 2011 un crédito de 1.200.000 euros que serán transferidos mensualmente a ACSUG.

*Financiamento do custo dos servizos traspasados do INEF-Galicia, actualmente Facultade de Ciencias do Deporte e a Educación Física da Universidade da Coruña, en cumprimento do Decreto 444/2003, do 18 de decembro, e dotación de prazas vinculadas do Servizo Galego de Saúde. As contías correspondentes a estes conceptos serán transferidas ás universidades polos departamentos competentes.

Os créditos destinados a estes fins no ano 2011 serán os seguintes:

INEF-Galicia, 2.945.254 euros que serán transferidos á Universidade da Coruña.

Prazas vinculadas SERGAS, 6.553.926 euros, distribuídos do xeito seguinte:

Universidade de Santiago de Compostela	5.272.500 euros
Universidade da Coruña	1.219.053 euros
Universidade de Vigo	62.373 euros

En anos sucesivos estes recursos experimentarán a variación que corresponda aos incrementos retributivos, básicos e complementarios, do persoal ao servizo da Comunidade Autónoma.

b) Subvención por capacidade investigadora:

Centrarase no apoio ás universidades que desenvolvan liñas de investigación consideradas nos eixos de actuación do Plan Estratéxico Galicia 2010-2014. Poderá incorporar novas actuacións segundo se vaian desenvolvendo sistemas precisos e homoxéneos de contabilidade dos custos indirectos das investigacións. A distribución realizarase mediante convocatorias competitivas entre as tres universidades.

A dotación inicial no ano 2011 será de 565.122 euros.

c) Subvención para a compensación dos custos inducidos pola normativa estatal e autonómica:

Inclúe compensacións ás universidades polo incremento de custos en actividades universitarias, derivadas de cambios normativos así como fondos finalistas transferidos á Comunidade Autónoma por outras administracións, con indicación expresa da administración pública competente para o pago das mesmas.



XUNTA DE GALICIA

A dotación inicial desta subvención para o ano 2011 será de 1.098.020 euros que se repartirá aplicando os mesmos criterios do fondo contemplado no punto I a) 2 deste acordo do que resultan as seguintes contías:

Universidade de Santiago de Compostela	428.776,81 euros
Universidade da Coruña	315.021,94 euros
Universidade de Vigo	354.221,25 euros

II- FINANCIAMENTO POR RESULTADOS

Os créditos asociados a este fondo contemplan as seguintes ferramentas:

a) Subvención por Resultados:

Os créditos asociados a este fondo distribuiranse en función de contratos programa individualizados que se acordarán con cada unha das universidades asinantes.

No período de vixencia deste Plan asinaranse dous contratos programa con cada unha das universidades, o primeiro deles comprenderá os anos 2011-2012 e o segundo estará vixente nos anos 2013-2015.

Nestes instrumentos de reparto recollerase a situación de partida e estableceranse os obxectivos de mellora de cada universidade para cada unha das seguintes áreas de acción:

- Adaptación ás necesidades sociais
- Docencia
- Investigación
- Transferencia de tecnoloxía
- Proxección internacional
- Responsabilidade social
- Xestión
- Campus de Ferrol, Lugo, Ourense e Pontevedra

As medicións dos resultados realizaranse aplicando indicadores asociados a cada unha das áreas, tal e como figura no Anexo do presente acordo, no cal se establece o procedemento de normalización e ponderación dos mesmos.

Nos anos 2011-2012 destinarase a este fondo un crédito de 19.005.940,00 euros que serán repartidos en función de criterios baseados no número de estudantes matriculados (incorporando un factor de corrección para eliminar desviacións nas transferencias por este concepto) e nos ingresos medios por proxectos competitivos nos últimos tres anos, en relación ao PDI de cada universidade.



XUNTA DE GALICIA

En aplicación destes criterios, as contías correspondentes a cada universidade serán as seguintes:

Universidade de Santiago de Compostela	7.507.346,30 euros
Universidade da Coruña	5.131.603,80 euros
Universidade de Vigo	6.366.989,90 euros

Nos anos 2013 a 2015 a asignación dos créditos correspondentes a este fondo determinarase pola aplicación dos indicadores das áreas de acción, calculados en base aos datos proporcionados polas universidades en cada exercicio.

O importe deste fondo nos anos de vixencia dos segundos contratos programa será, como mínimo, o equivalente ao 10% do total dos créditos destinados ao financiamento das universidades do SUG.

Durante a vixencia do presente plan, a Subvención por Resultados evolucionará consonte ao índice que resulte de multiplicar por dous o crecemento do PIB nominal da Comunidade Autónoma en cada un dos anos.

b) Subvención por Resultados de Investigación:

Contemplase neste fondo os créditos necesarios para o desenvolvemento das liñas de acción establecidas no Plan Galego de I+D+I, polas que se trata de promover a captación e o desenvolvemento de recursos humanos, definindo unha carreira científica que posibiliba a formación e consolidación de investigadores nas universidades galegas, así como dispoñer dos recursos para reforzar a excelencia investigadora do SUG e lograr unha maior proxección internacional.

Os créditos asociados a este fondo distribuiranse preferentemente mediante fórmulas de concorrencia competitiva.

No exercicio 2011 o crédito destinado a este fin será de 38.011.995,00 euros.

A Subvención por Resultados de Investigación evolucionará, durante a vixencia deste plan, co resultado de sumar tres puntos ao crecemento do PIB nominal da Comunidade Autónoma en cada un dos anos.

c) Subvención por Resultados de Transferencia Tecnolóxica:

A finalidade desta subvención é ordenar e potenciar os recursos e capacidades de investigación do SUG mediante o apoio a dous eixos estratéxicos fundamentais: a consolidación dos grupos de investigación e o desenvolvemento dun sistema integral de apoio á investigación nas universidades galegas.



XUNTA DE GALICIA

A distribución dos créditos correspondentes a este fondo, levarase a cabo mediante convocatorias en réxime de concorrência competitiva.

Os créditos destinados a esta subvención no ano 2011 serán 7.210.313,00 euros.

A Subvención por Resultados de Transferencia Tecnolóxica evolucionará, durante a vixencia deste plan, co resultado de sumar tres puntos ao crecemento do PIB nominal da Comunidade Autónoma en cada un dos anos.

III- FINANCIAMENTO POR MELLORA DA CALIDADE

Recolleá actuacións dirixidas á mellora de aspectos formativos, investigadores e de creación ou adaptación de infraestruturas.

No ano 2011 destinarase un crédito de 18.000.000,00 euros que será distribuído nas mesmas porcentaxes que se viñan aplicando ao Fondo Incondicionado do Plan de Financiamento do SUG 2005-2010 de xeito que corresponderanlle as seguintes contías:

Universidade de Santiago de Compostela	7.880.400,00 euros
Universidade da Coruña	4.699.800,00 euros
Universidade de Vigo	5.419.800,00 euros

Nos exercicios 2012 a 2015 o reparto deste fondo vincularase ao cumprimento por parte das universidades dos compromisos incluídos nos planos recollidos na cláusula quinta (planos de sustentabilidade) do presente acordo. En todo caso primaranse criterios de eficiencia e eficacia na xestión económico-financeira, da propia planificación académica das universidades públicas, e as medidas que permitan compartir recursos entre as tres universidades galegas.

Así mesmo, formarán parte do Financiamento por mellora da calidade os recursos proporcionados ás universidades galegas a través das distintas consellerías, entidades e organismos dependentes da Comunidade Autónoma, calquera que sexa a figura xurídica que adopten. Pola súa propia natureza estas achegas non quedan suxeitas a contía determinada e se engadirán ás contempladas neste fondo.



TERCEIRO.- EVOLUCIÓN DOS FONDOS

A evolución dos fondos no período de vixencia do presente plan determinarase aplicando as regras do apartado segundo deste acordo sobre as contías establecidas no exercicio 2011.

En todo caso, durante o período de vixencia do presente plan, a variación anual da contía total dos fondos contemplados no mesmo, estará suxeita á evolución anual do conxunto dos recursos que integran o sistema de financiamento da Comunidade Autónoma de Galicia segundo o establecido na Lei 22/2009, de 18 de decembro, pola que se regula o sistema de financiamento das Comunidades Autónomas de réxime común e Cidades con Estatuto de Autonomía e se modifican determinadas normas tributarias.

As modificacións que, de ser o caso, foran precisas para levar a efecto o anterior, imputaranse, de xeito proporcional, sobre as contías resultantes da aplicación das regras contidas no apartado segundo do presente acordo.

Á vista dos resultados obtidos polas universidades en relación a cada un dos tres fondos contemplados, poderase modificar a vinculación orzamentaria dos créditos.

CUARTO.- SISTEMA DE RECOLLEITA DE DATOS PARA O CÁLCULO DAS ACHEGAS.

Para proceder ao cálculo das contías correspondentes a cada un dos apartados anteriores, en aplicación dos criterios e indicadores asociados, as universidades se comprometen a remitir, con anterioridade ao 15 de novembro de cada ano de vixencia deste plan, toda a información precisa, certificada polo órgano competente de cada institución.

Co obxecto de unificar a información achegada e, para facilitar a aplicación dos criterios e indicadores aos resultados e a súa relación coa consecución dos obxectivos, a Consellería de Educación e Ordenación Universitaria elaborará os modelos de recollida e presentación dos datos a ter en conta no cálculo das diferentes partidas de financiamento.

No caso de que non resulte posible determinar o importe dalgún dos fondos contemplados no presente plan por causas imputables a unha universidade, asignarase á mesma o equivalente do 90% da percibida no exercicio precedente.



XUNTA DE GALICIA

QUINTO.- PRESENTACIÓN DE PLANOS DE SUSTENTABILIDADE FINANCEIRA POR CADA UNHA DAS UNIVERSIDADES PÚBLICAS DE GALICIA

Antes do 15 de febreiro de 2011, cada unha das universidades presentará, perante a Consellería de Facenda, o correspondente plan de sustentabilidade financeira que contemplará as medidas e obxectivos internos a acadar por cada unha delas nos exercicios económicos 2011, 2012 e 2013 e cuxo contido mínimo incluirá:

- a) a descrición da situación actual da universidade, e a orixe e xustificación da mesma
- b) as medidas correctoras, xa aplicadas ou a adoptar a partir da entrada en vigor do plan, para corrixir a situación existente
- c) o escenario de evolución da situación financeira da universidade para acadar o equilibrio orzamentario.

Unha vez presentado o antedito plan, será examinado por unha comisión constituída ad hoc e da que formarán parte representantes das consellerías de Facenda e Educación e Ordenación Universitaria. Esta comisión avaliará o plan presentado e propondrá á persoa titular da Consellería de Facenda a aprobación ou rexeitamento do mesmo. No caso de ser rexeitado, comunicárase á institución afectada os termos que deberán modificar para que, no prazo dun mes presente un novo documento que será sometido á análise e avaliación da mencionada comisión.

Anualmente, e con carácter previo á elaboración dos orzamentos xerais da Comunidade Autónoma para cada exercicio, a Comisión de Seguimento, á que se refire a cláusula sétima do presente acordo, analizará, á vista dos datos certificados por cada universidade, os resultados obtidos e o grao de cumprimento dos obxectivos indicados en cada un dos plans de sustentabilidade.

A non presentación do dito plan, a inadecuación do plan presentado aos obxectivos xerais de estabilidade financeira, e o grao de incumprimento dos obxectivos sinalados, determinará a porcentaxe de participación de cada universidade nos créditos contemplados no fondo para o Financiamento para a Mellora da Calidade.

SEXTO.- CUMPRIMENTO DE OBXECTIVOS DE EQUILIBRIO ORZAMENTARIO

As Universidades de Galicia comprométense ao cumprimento dos obxectivos de equilibrio orzamentario ao longo da vixencia deste acordo.

As Universidades deberán remitir á Intervención Xeral da Comunidade Autónoma a información sobre a execución do seu orzamento de xeito que permita a súa consolidación co resto do sector público para a verificación do cumprimento dos



XUNTA DE GALICIA

obxectivos de estabilidade orzamentaria. A Intervención Xeral da Comunidade Autónoma poderá solicitar as Universidades a información que considere necesaria para efectuar os procesos de agregación ou consolidación contable.

A estes efectos, a Intervención Xeral determinará os modelos e os prazos nos que se remitirá a información sobre a súa actividade económica e orzamentaria aos efectos do cumprimento da normativa comunitaria, estatal ou autonómica.

A falta de remisión da información nos prazos establecidos dará lugar, para a universidade afectada, á retención no libramento do Fondo para a Mellora da Calidade que lle corresponda, e terase en conta aos efectos de determinar a porcentaxe de participación da universidade nos créditos contemplados no fondo para o Financiamento para a Mellora da Calidade do seguinte exercicio.

A Consellería de Facenda instrumentará as medidas oportunas para o mellor seguimento deses obxectivos, entre as que figurarán as seguintes:

- Elaboración dun plan sectorial de contabilidade que se adaptará, posteriormente, ao modelo de referencia de contabilidade de custes que desenvolva a comisión creada ao efecto no ámbito estatal.
- Desenvolvemento do control a cargo da Intervención Xeral da Comunidade Autónoma, nos termos sinalados na Lei de Réxime Financeiro e Orzamentario.
- Aprobación de instrucións referentes á elaboración, execución e liquidación dos orzamentos.

As universidades do Sistema Universitario de Galicia presentarán antes do 31 de xullo de cada ano de vixencia do plan, a relación de postos de traballo, consensuada previamente cos representantes dos traballadores e debidamente valorada para o persoal de tódalas categorías da universidade, aos efectos previstos no artigo 81, apartado 4, da Lei Orgánica 6/2001, de Universidades. A esta relación acompañarase a previsión das modificacións que vaian a facerse efectivas no exercicio orzamentario seguinte.

Os proxectos de disposicións que creen ou modifiquen a estrutura orgánica das universidades ou os cambios das relacións de postos de traballo non derivadas dunha nova estrutura orgánica, incluíndo o seu custe, remitiranse á Consellería de Educación e Ordenación Universitaria, para a súa autorización pola Consellería de Facenda.

O desenvolvemento e execución do Plan de Financiamento do Sistema Universitario de Galicia 2011-2015, quedará suxeito ás adaptacións necesarias que puideran derivarse das medidas excepcionais que, en materia de estabilidade orzamentaria e/ou contención do gasto público, puidera adoptar, con carácter xeral e alcance básico, tanto o Goberno do Estado como a Xunta de Galicia.



SÉTIMO.- GRUPO DE TRABAJO

Para a mellora das actuacións derivadas do presente plan, crearase un grupo de traballo co obxectivo de propor medidas de aforro ao sistema universitario galego (SUG). Dito grupo estará integrado por un representante de cada unha das universidades do SUG ; dous representantes da Secretaría Xeral de Universidades, e outros dous representantes da Dirección Xeral de Orzamentos.

Este grupo emitirá anualmente un informe que incluírá unha listaxe coas dez principais medidas de racionalización do gasto e de mellora na eficiencia na xestión para o SUG. Este informe será incorporado á comisión de seguimento do plan descrita no apartado oitavo.

OITAVO.- COMISIÓN DE SEGUIMIENTO DO PLAN

Para garantir a correcta execución e o seguimento do establecido no presente acordo, créase unha Comisión de Seguimento que estará integrada por un representante de cada unha das universidades do Sistema Universitario de Galicia; pola persoa titular da Secretaría Xeral de Universidades, da Consellería de Educación e Ordenación Universitaria; pola persoa titular da Dirección Xeral de Orzamentos, da Consellería de Facenda; pola persoa titular da Intervención Xeral da Comunidade Autónoma, da Consellería de Facenda e pola persoa titular da Dirección Xeral de Investigación e Desenvolvemento, da Consellería de Economía e Industria.

A Comisión rexerase polo disposto na Lei 30/1992, de 26 de novembro, de Réxime Xurídico das Administracións Públicas e do Procedemento Administrativo Común sobre órganos colexiados e reunirse cantas veces o solicite cada unha das partes.

En todo caso, e con carácter previo á elaboración dos orzamentos xerais da Xunta de Galicia, reunirse para revisar os resultados obtidos en aplicación dos plans presentados polas universidades.

Esta Comisión terá como funcións:

- a) Efectuar o seguimento do cumprimento dos compromisos asumidos polas partes asinantes do presente acordo.
- b) Resolver as dúbidas e controversias que puideran xurdir na aplicación e interpretación das cláusulas deste acordo.



XUNTA DE GALICIA

c) Revisar anualmente os resultados obtidos en aplicación dos plans de sustentabilidade financeira presentados polas universidades, así como os obxectivos marcados nos respectivos contratos programa.

A estes efectos a Comisión poderá solicita das universidades asinantes, a información necesaria para constatalo.

d) Propor, á vista dos resultados obtidos, a revisión da estrutura do plan ou dos indicadores que sexan precisos para reflectir a consecución de obxectivos de xeito adecuado.

e) Calquera outra que se derive da execución do convenio e do espírito deste.

E en proba de aceptación, asinan de conformidade, no lugar e data indicados, comprometéndose a colaborar na plena e eficiente execución e desenvolvemento do Plan de Financiamento do Sistema Universitario de Galicia 2011-2015, segundo os principios de confianza lexítima, boa fe, lealdade institucional, transparencia e servizo á sociedade e ao interese xeral.

A CONSELLEIRA DE FACENDA

O CONSELLEIRO DE EDUCACIÓN E
ORDENACIÓN UNIVERSITARIA

O CONSELLEIRO DE ECONOMÍA
E INDUSTRIA

O REITOR DA UNIVERSIDADE DE
SANTIAGO DE COMPOSTELA

O REITOR DA UNIVERSIDADE
DA CORUÑA

O REITOR DA UNIVERSIDADE
DE VIGO